

共同經課 - 1 列王記下二章一節~二節, 六節~十四節

1 耶和華欲用捲螺風接以利亞上天的時, 以利亞及以利沙對吉甲去。2 以利亞給以利沙講:「你且踣遮, 因為耶和華差我去伯特利。」以利沙講:「我指永活的耶和華, 及你的活命來咒誓, 我無欲離開你。」二人就落去伯特利。6 以利亞給以利沙講:「你且踣遮, 因為耶和華差我去約但。」以利沙講:「我指永活的耶和華, 及你的活命來咒誓, 我無欲離開你。」in 二人就相及去。7 有先知的學生五十人去, 遠遠倚佇 in 的對面; 二人佇約但河邊啲倚。8 以利亞提伊的外衫捲起來, 拍許個水, 水就分雙旁, 二人行乾地過去。9 過去了, 以利亞給以利沙講:「我猶未受取離開你去, 我欲給你做甚麼? 你今著求。」以利沙講:「求你將感動你的神互我雙份。」10 以利亞講:「你所求的摠(oh)得啊! 總是我受取離開你的時, 你若看見我, 就欲得著, 若無, 就袂得著。」11 in 啲行啲講, 忽然有火車火馬隔開 in 二人, 以利亞就坐捲螺風上天。12 以利沙看見, 就叫講:「我的父啊! 我的父啊! 以色列的戰車及伊馬兵啊!」後來無閣看見伊。就提家己的衫來拆做二旁。13 伊拾以利亞磕落落來的外衫, 倒轉去倚佇約但河邊。14 伊用以利亞磕落落來的外衫拍水, 講:「以利亞的上帝——耶和華佇叨落?」拍水了後, 水就分雙旁, 以利沙就過去。

共同經課 - 2 詩篇七十七篇一節~二節, 十一節~二十節

1 A-sat ê 詩, 照 Ià-tō-tùn ê 做法; 交 hō 樂官。1) 我 beh 對上帝出聲求叫; 我對上帝出聲, 伊 beh àⁿ 耳孔聽我。2 Tī 我患難 ê 日我 chhē 主; 我 tī 暝時 kiàh 起手無停, 我 ê 心 m̄ 肯受安慰。11 我 beh 講起耶和華 ê 所行, Siàu 念伊早時 ê 神跡。12 我 beh 忖度你 ê 所行, 靜靜想你 ê 所做。13 上帝 ah, 你 ê 路是聖 ê; 有甚麼神明大親像上帝? 14 你是行奇事 ê 上帝; 你 bat tī 萬百姓 ê 中間, 顯明你 ê 權能。15 你 bat 用你 ê 手贖回你 ê 百姓, 就是雅各 kap 約瑟 ê kiàⁿ 孫。[Sè-làh]16 上帝 ah, chiah-ê 水見 tiòh 你, Chiah-ê 水見 tiòh 你, lóng 驚惶, 深淵亦 ngiàuh-ngiàuh-chhoah。17 密雲 piàⁿ 出水, 穹蒼出聲, 你 ê 箭四界射。18 Tī 捲螺風內有你雷 ê 聲; Sih-nà ê 光 sih 到 thong 世間; 地 ngiàuh-ngiàuh-chhoah, koh 振動。19 你 ê 道路 tī 海中, 你 ê 路徑 tī 大水中, 你 ê 腳跡無人能知。20 早你用摩西亞倫 ê 手, Chhoā 你 ê 百姓親像羊群。

共同經課 - 3 加拉太書五章一節, 十三節~二十五節

1 基督解放咱做自由, 所以恁著倚在, 莫得閣掛著彼個做奴僕的軛。13 兄弟啊, 恁受召是來得著自由, 獨獨莫得用自由做肉體的機關, 是著對仁愛相服事。14 因為全律法包含佇一句, 就是講「疼厝邊親像家己」。15 設使恁相吞咬, 驚了會相滅無, 恁著謹慎。16 今我講, 恁著照神來行, 就無成肉體的私慾。17 因為肉體愛攻擊神, 神愛攻擊肉體, 二個相對敵, 互恁無行所愛行的。18 獨獨恁若互聖神所引導, 就無佇律法下。19 今肉體的品行有露現, 親像姦淫、污穢、邪僻、20 拜偶像、邪術、結冤讎、相爭、怨恨、受氣、結黨、分旁、異端、21 怨妒、酒醉、放蕩, 以及親像此號的。我前曾代先講, 今也代先給恁講, 見若常常行按呢的將來無承接上帝的國。22 若是聖神的果子, 就是仁愛、歡喜、和平、23 吞悞、慈悲、善良、忠信、溫柔、擲節。親像此號無有律法禁伊。24 閣屬基督耶穌的人, 曾將肉體及伊的情, 伊的慾釘佇十字架。25 咱若照神來活, 著照神來行。

共同經課 - 4 路加福音九章五十一節~六十二節

51 耶穌受接上天日期欲到, 就決意向耶路撒冷來行, 52 差使者做頭去。in 去入撒瑪利亞人一個鄉社, 欲給伊備辦。53 若是 in 毋接納伊, 因為伊向耶路撒冷啲行。54 伊的學生雅各、約翰看見按呢, 就講:「主啊, 你愛阮叫火對天落來滅 in 嗎?」55 耶穌越轉身責備 in。56 大家就去別個鄉社。57 in 行路的時, 有人對耶穌講:「你無論叨落去, 我欲隨你。」58 耶穌給伊講:「狐狸有孔, 天中的飛鳥有巢, 獨獨人子無靠頭殼的所在。」59 閣對一人講:「隨我!」彼人講:「主啊, 互我倒去先埋葬我的老父。」60 耶穌給伊講:「出在死人埋葬 in 的死人, 若是你著去傳報上帝的國。」61 閣一人講:「主啊, 我欲隨你, 總是准我先去及家內的人相辭。」62 耶穌對伊講:「見若手按犁尾來看後面的, 無合佇上帝的國。」